

REGIONAL NEWS

HEADLINES:-

1. Pathianni zing atanga nimin tlai thlenga thlipui, ruah leh rial tla-in Mizorama in a tichhiat chu 1,600 chuang a tling tawh.
2. Excise and Narcotics department hnathawkte chuan vawiin khan Falkland veng a Aizawl View hmunah heroin kg 5 leh gram 427 a rit an man.
3. Congress hruaitu Rahul Gandhi chuan vawiin khan Kerala-a Wayanand bialah Lok Sabha inthlan chuh turin hming a pe
4. Tukina Taiwan-a magnitude 7.4-a naa lirnging avangin mi pasrih an thi a, mi 700 chuangin hliam an tuar.

<><><>

DISASTER

Pathianni zing atanga nimin tlai thlenga thlipui, ruah leh rial tla-in Mizorama in a tichhiat chu 1,600 chuang a tling tawh.

Nimin tlai dar 3 vel khan Lawngtlai district-a Sangau khua-ah rial tam tham tak a tla a. In 542 a tihchhia a. He'ng zinga in paruk chu luah tlak lohin a chhia a ni. Nimin tlaia rial tla hi a tam thamin, artui tiat dawn te a ni a, rial tla hian kawngpui hnawhpingin khawl hmanga thenfai a ni. Hriattheih chinah rial hian Ramhlun Sangau ah In 39 a tichhia a, Sangau-I ah In 48, Sangau-II ah In 127, Sangau-III ah In 50 leh Sangau - IV ah In 109 a dengchhia a. Sangau khua bikah hian In 373 a dengchhia a, thawmthat deuh a luahzui leh mai theih te niin, luahzui tlak loh a chhia a awm hriat a ni lo. Rial tla hian Pangkhuaah In 15 dengchhiain, luahzui tlakloh In 2 a awm a, Thaltlangah In 57 chhiain, In pali chu luahzui tlak a nilo a. Cheural-ah In chhia 48 a awm bawk a ni. Heng bakah hian Rawlbukah In pakhat rial hian a dengchhia a, Sentetfiangah In chhia 48 a awm bawk a ni.

Lawngtlai East bialtu MLA Dr. Lorrain Lalpekliana Chinzah chuan tanpuina hmasa atan nimin tlai khan Silpaulin engemawzat a pe nghal a. Vawiin khan bialtu MLA hi a dam that loh vangin aiawh tirin LADC a ZPM MDC Pu K. Hre Kung hovin ZPM Lai District hruaituten chhawmdawlina an sem chhunzawm a, an mamawh dan a zirin silpaulin leh pawisafai ten tanpui an ni.

Puan tawh angin Thawhtanni tuka rial tla khan Kolasib District-a khua leh veng 9-ah mihring chenna In leh mihring chenna ni lo, sorkar building leh Biak In 744 a tichhia a. In chhiate hi a tam zawk chu rial-in a chung chauh a tihchhiat te niin, thli a tel avanga Lungdai-ah chenna in pakhat chu a vaiin a chhe vek a ni. Kolasib district bawrsap pisa-a District Disaster Management & Rehabilitation, Kolasib-in an chhinchhiah dan chuan thli leh rial thawk avanga harsatna tawk khua te hi hriat theih chinah Lungdai, Serkhan, Buhchangphai, Bilkhawthlir North leh South, N Chawnpui, N. Chhimluang, Saiphai leh Saipum te an ni.

Champhai district-ah pawh thlipui thawkin in 134 a tichhia a. In 5 luah tlak lohvin a chhia a, In 129 chu a then azar a chhia a, chung zingah chuan Middle sikul 1, High School 1, Higher Secondary School 1, PES 1, Supply Kudam 1, Myanmar raltlante dahna buk 7 leh Distric Jail 1 te an ni. Tun thlenga hriat theih chinah Champhai District-a khua leh veng 23 a mihring 690 ten an tuar a ni. Report hi a la lut reng a ni.

Mamit district-ah chuan Thawhtanni tuka rial tla khan in 55 a tichhia a. A hma ni a thlipui tleh khan in 52 a ti chhe bawk. Khawzawl district-ah chuan Pathianni a thli tleh leh rial tla avangin in 77 a chhia report dawn a ni tawh a ni.

Serlui bialtu MLA Pu Lalrinsanga Ralte chuan Pathianni kalta zana rial nasa tak tla in Serlui bial chung khaw hrang hrang - Bilkhawthlir, Saipum, Saiphai, N. Chhimluang leh N. Chawnpui khuaa chenna In, Biak In, Vantlang building leh sorkar building 580 zet a tihchhiat chu nimin leh vawiin khan a tlawh. Hriat theih chinah Serlui bial chungah hian rial tla hian chenna In, Biak In, Vantlang hmun leh sorkar building a tihchhiat zat hi Bilkhawthlir ah 414; Saipum ah 67; Saiphai ah 7; N.Chhimluang ah 76 leh N.Chawnpui ah 16 ani a, a vaiin 580 zet a ni.

Tunhnaia Mizorama ruah,thlipui leh rial thawk avang khan hriat theih chinah Saitual District huam chung khaw 6, heng Keifang, Saichal, Tawizo, Buhban leh Lailak atangin chungkaw 43 leh Tualbung khuaah chenna in chung rial den chhiat 74 nen In chhia report hi avaiin 117 a a awm a.

Thli leh rialin Pathianni leh Thawhtanni a a tihchhiat tanpuina hi State Disaster Respond Fund (SDRF) hnuai atangin vawiin khan chhiat tawk chungkua te Bank Account-ah Saitual Bawrsap Dr. Lalngura Tlau hmalakna-in thun a ni. Account kimchang thawn rang thei khuaten Fund hi an hmu hmasa a, Tualbung khua hi an thatnem deuh avangin chanchin buatsaih lai hian bank account kimchang an la inkhawn kim thei lova, an account kimchang thawn a nih veleh tanpuina sum hi pek nghal tur a nih thu Bawrsap Pisa hotute chuan an sawi.

<><><>

BOOTH CAMP

US Consulate Kolkata Public Affairs Officer Elizabeth Lee chuan Mizo hmeichhiate'n hmasawn an duh takzet tih sawiin mahni kutkawih eizawna hmanga bultan tum tak tak te puih an tum tih a sawi.

He thu hi nizana U.S. Consulate General Kolkata leh Contact Base tangkawp buatsaih ni 2 aw hmeichhia mahni kutkawih eizawna bultan inzirtirna hun State Level Bootcamp ah sawiin Elizabeth Lee chuan tun dinhmunah Mizo hmeichhe 50 te chuan bul tan tumin mithiam tam tak hnen atangin zirtirna an dawng a ti a, hei hian anmahni ah hmasawna tam tak a siam dawn tih sawiin mizo hmeichhe 50 bakah midang tam tak pawh an thil buatsaih chu zawm ve an duh a ti a, hmarchhak state leh hmun dang dangah pawh midang tam tak bultan pui an nei tawh a ti a, hmeichhe 400 chuang zirtirna an pe tawh tih a sawi.

Academy for Women Entrepreneurs te tana State Level Bootcamp hi April ni 1 khan tan niin nizan khan zawh fel a ni a, ni 2 aw h training ah hian Mizo hmeichhe mahni kutkawih eizawna bultan mi 50 te he hunah hian zirtir niin Mizorama, West Bengal leh hmarchhak state hrang hrangah sumdawna lama mithiam ten zirtirna an pe a ni.

He boot camp neih chung hian hmeichhia sumdawna bul tan tur te chu eizawna kawngzawh dan tur leh an bul tan huna an tih tur hrang hrang zirtir an ni a, puan tah, eisiam leh kut themthiamna lam hawi leh incheina lam kawnga hmasawna an neih theih nan zirtirna pek an ni a, harsatna hrang hrang tawh huna hmachhawn dan te leh midang dawr dan bakah hmasawna chi hrang hrang an zir a, mi hlawhtling tam tak chanchin ngaihthlak niin heng atanga zir tur hrang hrang te pho chhuah a ni a, he bootcamp zawh hian a tel te chuan online kaltlangin zirna an duh chuan an chhonzawm thei dawn a ni.

<><><>

HEROIN HAUL

Excise and Narcotics department hnathawkte chuan vawiin khan Falkland vanga Aizawl View hmunah heroin kg 5 leh gram 427 a rit an man.

Vawiina heroin man hi Mizorama tum khata heroin man hnem ber pawl ni a hriat a ni a. Department thupuangtu Peter Zohmingthanga sawi danin vawiin chawhma dar 10:30 khan Aizawl View, Falkland Veng-ah Heroin Kg 5 leh Gram 427 (Hawng 440) leh a neitu nia puh mi pahnih – Lalnunmawia, Puia ti a koh (38) , Teidu, Tripura (tuna Edenthar Venga khawsa mek) leh Lalchawiliana (34) Khampat Kanaan, Myanmar (tuna Vairengte Kawngthar vanga khawsa mek) ni a inchhalte chu an man. Heng Heroin te hi Myanmar atanga rawn lak, Second Hand Bale kara thuhruk an ni. Heroin phurh kualna atana hman TATA YODHA truck (MZ01 V-2018) pawh hrensak nghal an ni. Heroin vanga mante hi The Narcotic Drugs & Psychotropic Substances Act, 1985 tlawhchhanin thubuai siamsak an ni.

<><><>

POLL-EXHIBITION

Lok Sabha Inthlanpui 2024 lo awm tur atana SVEEP Aizawl District in election chungchang inhrilhriatna leh zirtirna kawnga hma a lakna peng khat atan Millennium Centre chhuat zawlah Art Workshop & Exhibition a buatsaih.

Vawiin chawhma khan Aizawl District Election Officer, Pi Nazuk Kumar chuan lemziak pholanna hun hi a hawng a. He Art workshop & exhibition hi ni thum chhunga hun hman tur niin April ni 5 thleng a awh dawn a, Aizawl Art Gallery & School of Fine Arts nen thawk hova buatsaih a ni.

Pi Nazuk Kumar chuan MLA inthlanah Mizorama vote a tlak that viau thin thu leh a dawt chiah MP inthlan ah vote tla a kiam tak thin thu a sawi a. A inkar a hlat loh avangin MP inthlan chu ngaih pawimawh thar a tul tih sawiin DEO chuan seat pakhat chauh nei mahse seat pakhat luahtu chuan state tan hmasawna tur tam tak a thlen theih thu a sawi a. Lemziak thiamte nen thawk hova, vote pawimawhna an puangchhuak ho thei tur chu lawmawm a tih thu sawiin vote nei tawh phawt chuan vote thlak ngei turin mipui a chah a ni.

He hunah hian Aizawl Art Gallery & School of Fine Arts Pu Laltanpuia chuan Art chu thu pawimawh inhrilhriatna hmanraw tangkai a nih thu sawiin, inthlanpui pawimawh tak ram in a hmachawn tur inpuahchah naah DEO Aizawl leh a thawhpuite'n lemziak thiamte an thawhpui chu lawmthu a sawi a ni.

<><><>

ARECA NUT

Vawiin khan Mamit District Thalai Pawl hruaitute te leh Hachhek Bial Kuhva Chingtu Pawl hruaitute chuan Mizoram Sorkarin Foreign Kuhva dan lova Mizoram chhunga lakluhte dona atan Mamit District chhungah sawrkar hmalakna hmun Dapchhuah leh Zamuang Check post te rintlak leh changtlung zawka thuam tha turin Mizoram sawrkar an ngen.

Mizoram chhunga Kuhva tharchhuah te hralh kawngah Mizoram sawrkarin kuthnathawktute kut a dah mai lovin an mawhawh ang hralhna tha zawk an nei theih na'na hma laksaka Minimum Support Price pawh siamsak tur leh Mizoram

kuhva tharchhuah te State danga a hnawng mai loh na'na hma laksak turin an ngen a ni.

<><><>

MZP

MZP chuan MPSC Civil Service combined examination hnalak hnuhnung berah thil fello tam tak a awm ngei niin an hria tih sawiin thalai hna zawng mek ten MPSC-ah rinna an nghah zel theih na'n, MPSC Chairman bang turin an ngen tih an sawi.

MZP Executive Committee thuchhuah tarlan danin MPSC Civil Service combined exam paper thenkhatah correcting fluid-te hman niin, mark pek tawhsa thaichhiatna leh mark tihdanglamna hnuhma thahnem tak a awmin an hria tih sawiin MPSC hnuaiah hetiang sulhnu mak tak tak a awm chu MZP in pawl a ti takzet a ti a. Thil diklo tak thleng chu MPSC Chairman thiam loh a nih avangin, MPSC zahawmna humhim a nih zel theih na'n leh thalai hna zawng mekte'n MPSC-ah rinna an nghah zel theih nan, MPSC Chairman chu bang turin an ngen tih an sawi.

<><><>

ELECTIONEERING

Congress hruaitu Rahul Gandhi chuan vawiin khan Kerala-a Wayanand bialah Lok Sabha inthlan chuh turin hming a pe. Vawiin khan Pu Gandhi hian Kalpetta kuaah kawngzawh a huaihawt a. He hunah hian Congress General Secretary Priyanka Gandhi leh Kerala State Assembly a Opposition Leader KC Venugopal ten an tawiawm a ni.

Prime Minister Narendra Modia pawhin vawiin khan NaMo app kaltlanga thuchah thawndarhin BJP hruaitute chu inthlanpuia an chetthat ber tum thlentir turin a chah a. BJP mi leh sa ten phur taka hma an la chu opposition hruaitute an zam phah hle a ti a. Tun hma lama inthlanpui record lo awm tawh zawng zawng khum vek turin a sawm a ni.

<><><>

ECONOMY

Ramchhung eibar dinhmun chu kum 2024 chhungin zaa 7.5 in a thang dawn niin World Bank chuan a sawi. World bank chuan ahmaa alo chhut lawk dan ennawnin zaa 1.2 in a ti pung a ni.

World Bank tarlan danin South Asia Development Update thar berah Asia chhim lam thanna turi hi kum 2024 chhungin zaa 6 niin a chhut lawk a. Hei hi a chhan ber chu India hmasawna leh Pakistan leh Sri Lanka te indinthar mek vang a nih thu tarlan a ni bawk.

He report-a tarlan danin South Asia hi kum hnih chung khawvela thang chak ber a ni chhunzawm dawn a. Kum 2025 ah zaa 6.1 in a thang dawn a ni.

<><><>

TAIWAN EARTHQUAKE

Tukina Taiwan-a magnitude 7.4-a naa lirnging avangin mi pasrih an thi a, mi 700 chuangin hliam an tuar. Thudawn danin lirnginna hmun hi Taiwan khawchhak lam tuipui kam a ni a. A chhehvelah tsunami thleng thei anih avangin inralring tura hriattirna tihchhuah a ni a. United States Geological Survey (USGS) chuan lirnging hi magnitude 7.4 anih thu sawiin a intanna epicentre hi Taiwan khawpui Hualien City atanga chhim lam km 18 ah a ni a. Leihnuai km 34.8 a thuk atangin a intan niin a tarlang.

Taipei-a Sismology Centre director Wu Chien Fu chuan Taiwan rampumah lirnging hi hriat anih thu sawiin kum 25 hnuai a la nat ber tum a ni a ti.

Japan chhim lam tui puiah pawh liringhing hi hriat anih avangin tsunami thleng thei laka inralinna chuah a ni a. Miyakojim aleh Okinawa thliarkarte chu inralring turin Japn Meteorological Agency chuan a hriattir a ni.

<><><>